



NEWSLETTER BR. 22

AUGUST 2016

SADRŽAJ

FIPA AKTIVNOSTI ≡

- » FIPA partner Investiciono-razvojne konferencije u Trebinju
- » Presentacija FIPA-e na konferenciji TARIM
- » Sastanak : FIPA-Švedska privredna komora u BiH
- » FIPA-MIP: Zajednički rad na promociji Bosne i Hercegovine i privlačenju stranih investicija
- » ŠEIK ABDULAZIZ BIN JASSIM ALI AL- THANI NAJAVIO ULAGANJA U BiH
- » FIPA nastavlja suradnju sa bh. dijasporom u Švedskoj
- » Aftercare posjeta firmi Valley Aqua
- » Ambasadori BiH na pripremama u FIPA-i

POSLOVNE VIJESTI ≡

- » SAJAM BH PRIVREDE U KUVAJTU
- » Najveći Outlet centar u regionu gradit će se u Općini Ilijaš
- » PRVI BIH KONGRES O VODAMA
- » Turska investicija u Tuzli otvara nova radna mjesta
- » Turski investitor otvara pogon za rafinisanje jestivog ulja

FIPA AKTIVNOSTI ≡



FIPA PARTNER INVESTICIONO-RAZVOJNE KONFERENCIJE
U TREBINJU



SASTANAK : ≡
FIPA-ŠVEDSKA PRIVREDNA KOMORA U BIH



...I JOŠ FIPA AKTIVNOSTI...



FIPA PARTNER INVESTICIONO-RAZVOJNE KONFERENCIJE U TREBINJU



Grad Trebinje, u suradnji sa fondacijom „Konrad Adenauer“ i Agencijom za unapređenje stranih investicija BiH (FIPA), organizirao je dvodnevnu Investiciono-razvojnu konferenciju koja je održana 30. i 31. avgusta u Trebinju. Otvaranju konferencije prisustvovali su član Predsjedništva BiH Mladen Ivanić, ministar vanjske trgovine i ekonomskih odnosa Mirko Šarović, ministar inostranih poslova Igor Crnadak, ambasadori Češke Republike, Srbije i Hrvatske, zamjenik ambasadora Crne Gore, predstavnici Ambasade Rusije, te načelnici i predstavnici općina iz istočne Hercegovine.

Prvi dan konferencije bio je posvećen predavljanju projekata i lokalnih gastro brendova grada Trebinja, pri čemu je gradonačelnik Trebinja Slavko Vučurević istakao da je cilj konferencije da se predstave realizirani i planirani projekti, ističući zahvalnost ambasadama zemalja koje su investirale prethodnih godina na ovom području.

U okviru drugog dana konferencije predstavljeni su razvojni potencijali Trebinja sa posebnim naglaskom na sektor infrastrukture, turizma, poljoprivrede i proizvodnje hrane, kao i mnogobrojne mogućnosti realizacije projekata kroz model privatno-javnog partnerstva.

Također su predstavljeni realizirani i planirani projekti u Trebinju, kao i potencijali, uspješne priče i perspektive za ekonomski razvoj Hercegovine u sektoru turizma, informaciono-komunikacionih tehnologija i obrazovanja. Istaknuto je da postoje ogromni potencijali za investiranje i pozvani su svi predstavnici grada Trebinja, općine Hercegovine i privrednici da kandidiraju svoje investicione projekte koje će FIPA promovirati stranim investitorima kako bi se uspostavila poslovna partnerstva i omogućila realizacija projekata.



PREZENTACIJA FIPA-E NA KONFERENCIJI TARIM



U okviru konferencije TARIM, održane 30. augusta 2016. godine u Sarajevu, pomoćnik direktora FIPA-e dr. Maida Bećirović održala je prezentaciju o mogućnostima ulaganja u Bosnu i Hercegovinu delegaciji turskih privrednika.

Ovom prilikom, istaknute su predosti ulaganja u BiH, sa posebnim osvrtom na poljoprivredni sektor, gdje su predstavljeni i konkretni projekti za ulaganja.



SASTANAK : FIPA-ŠVEDSKA PRIVREDNA KOMORA U BIH



Predsjednik privredne komore Švedske u BiH Adnan Hadžić sa suradnicima posjetio je 23. augusta Agenciju FIPA. Tom prilikom razgovaralo se o suradnji dvije institucije u oblasti promoviranja privrednih potencijala Bosne i Hercegovine u Švedskoj, organizaciji privrednih susreta, gdje bi se razmjenjivala iskustva švedskih privrednika o radu u BiH, te eventualno istakli problemi na koje nailaze u svom poslovanju, uključujući načine rješavanja prepreka.

Zaključeno je da je neophodno ostvariti intenzivniju suradnju ove dvije institucije, imajući u vidu potencijale Švedske, kao i dijasporu Bosne i Hercegovine u Švedskoj koji bi se mogli staviti u funkciju ekonomskog razvoja BiH i većeg priliva investicija.



FIPA-MIP: ZAJEDNIČKI RAD NA PROMOCIJI BiH I PRIVLAČENJU STRANIH INVESTICIJA



Predstavnici Agencije za unapređenje stranih investicija BiH (FIPA) razgovarali su sa ambasadorom Bosne i Hercegovine u Kuvajtu Nj. E. Mehmedom Halilovićem o zajedničkom radu na prezentaciji projekata za ulaganje u BiH, promociji zemlje, kao i medijske kampanje „Invest in Bosnia and Herzegovina“ u Kuvajtu.

Ambasador Halilović je informiran o trenutnim aktivnostima Agencije na promociji zemlje i pronalasku investitora, suradnji sa nadležnim institucijama u BiH koje su nadležne za privlačenje stranih investicija, suradnje sa inostranim medijima u okviru koje promovira BiH kao lokaciju koja nudi značajne mogućnosti za ulaganje.

Također je upoznat sa trenutnim prilivom stranih ulaganja iz Kuvajta u BiH, koji prema podacima Centralne banke BiH, zaključno sa decembrom 2015. godine iznose, 168 miliona KM (86 miliona eura), te da se Kuvajt nalazi na 14. mjestu liste najznačajnijih investitora u BiH.

G. Halilović je govorio o trenutnim aktivnostima bh. ambasade u Kuvajtu na polju povećanja izvoza iz BiH, o predstojećem sajmu bh. proizvoda koji će se održati u Kuvajtu do kraja tekuće godine, kao i projektu Outlet centra koji će se graditi na području Općine Ilijaš, a koji predstavlja kuvajtsku investiciju.

Od ambasadora Halilovića je između ostalog zatražen puni angažman na realizaciji promotivne kampanje „Invest in Bosnia and Herzegovina“ koju je FIPA pokrenula sa ciljem daljeg poboljšanja imidža zemlje i skretanja pažnje stranih investitora na potencijale BiH, kao i na koordinaciji aktivnosti vezanih za organiziranje promotivnih skupova koje će se održavati u narednom periodu u Kuvajtu.



ŠEIK ABDULAZIZ BIN JASSIM ALI AL-THANI NAJAVIO ULAGANJA U BIH-SLIJEDEĆI MJESEC PONOVO DOLAZI U BIH SA ODABRANIM PROJEKTIMA ZA INVESTIRANJE



Šeik Abdulaziz Bin Jassim Ali Al-Thani, član kraljevske porodice Katara, najavio je značajna ulaganja u različite projekte u BiH na sastanku sa direktorom Agencije za unapređenje stranih ulaganja BiH (FIPA) Gordanom Milinićem i suradnicima održanim 18. augusta 2016. godine.

G. Al-Thani je iskazao najveći interes za projekte saobraćajne infrastrukture sa posebnim akcentom na aerodrome u BiH i trenutno raspoložive projekte koji se tiču proširenja aerodroma, te projekte iz oblasti turizma, prehrambene industrije i metalnog sektora.

Informiran je o radu FIPA-e i njenoj suradnji sa nadležnim institucijama u BiH, uvjetima za strana ulaganja u BiH, te raspoloživim investicijskim projektima.

G. Milinić je pozvao šeika Al-Thanija da pomogne u animiranju investitora iz Katara da ulažu novac u BiH i na taj način doprinesu zapošljavanju bh. građana, s obzirom da BiH raspolaže projektima za koje su investitori iz ove zemlje zainteresirani.

Najznačajnija investicija iz Katara u BiH se odnosi na projekat Al- Jazeera Network Sarajevo. U planu je realizacija projekta sportsko-turističkog centra u Bugojno koju realizira firma Biser Rostova, dok je povećan interes i za ulaganja u sektor nekretnina. Šeik Al-Thani je najavio ponovni dolazak u BiH idući mjesec sa konkretnim prijedlozima za investiranje i u pratnji nekoliko značajnih katarskih investitora. Uručeni su mu trenutno raspoloživi investicijski projekti i obećana sva potrebna pomoć za uspješnu realizaciju investicija.



FIPA NASTAVLJA SURADNJU SA BH. DIJASPOROM U ŠVEDSKOJ



Predstavnici Agencije za unapređenje stranih investicija BiH (FIPA) razgovarali su sa predstavnicima nevladine organizacije APU mreža koja okuplja bh. dijasporu u Švedskoj o nastavku suradnje na polju promocije Bosne i Hercegovine. Na sastanku je istaknuto da je bh. dijaspora dobro integrirana u švedsko društvo i da ona broji značajan broj istaknutih privrednika koji bi mogli dati svoj doprinos razvoju BiH.

Ovom prilikom je zaključeno da će se nastaviti aktivna suradnja između FIPA-e i APU mreže, da će zajednički raditi na prezentaciji bh. privrednih potencijala u Švedskoj i BiH, kao i na predlaganju mjera za unapređenje poslovnog ambijenta i promociji naše zemlje u Švedskoj.



AFTERCARE POSJETA FIRMI VALLEY AQUA



U okviru Aftercare programa FIPA-e za 2016. godinu, posjećena je kompanija Valley Aqua doo u Bugojnučiji osnivači su fizičko lice iz Kuvajta i bosanski državljanin.

Firma Valley Aqua osnovana je u martu 2015. godine. Dobila je koncesiju za eksploataciju i flaširanje vode u okolini Bugojna, a objekat je izgrađen i pripremljen za proizvodnju, čiji početak se očekuje u septembru ove godine.

Fabrika će zapošljavati 15 radnika, te dodatno administrativno osoblje.

Sva proizvodnja je namijenjena izvozu u zemlje Golskog zaljeva.



AMBASADORI BIH NA PRIPREMAMA U FIPA-I



Direktor Agencije za unapređenje stranih investicija BiH (FIPA) Gordana Milinić primio je novoimenovane ambasadore BiH u Holandiji i Ruskoj Federaciji N.J.E. Mirsadu Čolaković i N.J.E. Mustafu Mujezinovića kako bi ih upoznao sa aktivnostima Agencije na privlačenju stranih ulaganja, promociji zemlje i njenih potencijala, te informiranju ciljnih grupa o raspoloživosti investicionih projekata BiH.

Istakao je da je FIPA u čvrsto opredijeljena da pruži puni doprinos da Bosna i Hercegovina postane bolje mjesto za život i rad svih njenih građana, u čemu ima punu podršku Vijeća ministara BiH, a očekuje se da i ekonomska diplomatija da svoj puni doprinos na ovom putu.

Ambasadori su upoznati sa trenutnim prilivom ulaganja iz Holandije i Ruske Federacije u BiH, te iskazanom interesu investitora za određenim privrednim sektorima i projektima. Zatražen je njihov puni angažman u promotivnoj kampanji „Invest in Bosnia and Herzegovina“ koju je FIPA pokrenula sa ciljem daljeg poboljšanja imidža zemlje i skretanja pažnje stranih investitora na potencijale BiH.

FIPA od svih ambasadora BiH očekuje da im ekonomska diplomatija bude prioritet u radu, da rade na dovođenju investitora u zemlju kao i na povećanju izvoza iz BiH.

G. Milinić je zaželio ambasadorima uspješnu misiju uz želju za ostvarenjem što više kontakata sa potencijalnim investitorima u zemljama u kojima će djelovati u službi Bosne i Hercegovine, a koje će uputiti na FIPA-u radi realizacije investicija.

POSLOVNE VIJESTI ≡



NAJVEĆI OUTLET CENTAR U REGIONU GRADIT ĆE SE U OPĆINI ILIJAŠ



TURSKI INVESTITOR OTVARA POGON
ZA RAFINISANJE JESTIVOG ULJA



...I JOŠ FIPA POSLOVNIH VIJESTI...



SAJAM BH PRIVREDE U KUVAJTU

Obzirom da zainteresiranost za Bosnom i Hercegovinom u zemljama Perzijskog zaljeva raste iz godine u godinu, te da postoji veliki broj potencijalnih investitora koji su zainteresirani za ulaganje u BiH, kompanija FK Logistic Group će, u suradnji sa Ambasadom Bosne i Hercegovine u Kuvajtu, biti organizator i domaćin najvećeg sajma industrije BiH koji će se održati od 20. do 23. novembra 2016. godine u Kuvajtu. Kompanija FK Logistic Group jedna je od prvih kompanija koje su ušle na tržište BiH radeći, između ostalog, na organiziranju direktnih avionskih linija između BiH i Kuvajta, na podršci bh. turizma, promociji trgovinske suradnje stvaranjem ozbiljnog odnosa između vlasnika kapitala i investitora, te sektora industrije i biznisa u BiH. Cilj sajma je promocija Bosne i Hercegovine, te ujedno velika prilika za bh. kompanije da predstavljaju svoje proizvode, pronađu partnere i investitore, te prošire svoje tržište.

Učešće na sajmu mogu uzeti sve bh. kompanije iz različitih oblasti:

- Teška industrija
- Turističke organizacije
- Poljoprivreda i prehrambena industrija
- Naftna industrija
- Lječilišta
- Obrazovne institucije
- Građevinski sektor
- Ostali

Bitno je spomenuti da i oni koji nemaju registriran biznis već samo ideju koju žele razviti i za koju im je potrebna investicija, mogu doći na sajam i potražiti investitora za ideju. Ovaj sajam odražava novi koncept ulaganja u Bosnu i Hercegovinu i nova je destinacija za sve investitore i vlasnike kompanija. Sajmu će također prisustvovati i zvanične vlasti iz Bosne i Hercegovine koje će zainteresiranim stranama omogućiti pružanje informacija i odgovora na sve upite vezane za poslovna partnerstva između dvije strane. Za sve dodatne informacije posjetite web stranicu www.info-logistic.net ili pošaljite Vaš upit na email: bihexpo@gryphonairlines.com.kw



NAJVEĆI OUTLET CENTAR U REGIONU GRADIT ĆE SE U OPĆINI ILIJAŠ

Memorandum o razumijevanju, koji podrazumijeva izgradnju Outlet centra na području Općine Ilijaš na 57000 m² prostora su potpisali u ime Općine Ilijaš načelnik Akif Fazlić i Izvršni direktor firme MAKSAB d.o.o. Sarajevo Adulla Al-Haran.

Projekat se odnosi na izgradnju Outlet centra u kojem će biti smješteno 97 trgovinskih objekata koji će uključivati mnoge svjetske brendove po veoma konkurentnim cijenama. U sklopu centra bit će izgrađena i 63 stambena objekta. Ključni značaj investicije se ogleda u otvaranju novih radnih mjesta, a prema obećanjima investitora planirano je zapošljavanje preko 300 ljudi.



PRVI BIH KONGRES O VODAMA

Prvi BiH kongres o vodama održaće se u Sarajevu 27. i 28. oktobra 2016. godine u organizaciji UKI BiH (Udruženje konsultanata inženjera Bosne i Hercegovine) i institucija koje u Bosni i Hercegovini participiraju u upravljanju vodnim resursima. Svjesni smo vremena u kome se nalazi BiH društvo i privreda, te značaja voda u svim aspektima njenog održivog korištenja, zaštite od njenog štetnog djelovanja i zaštite voda kao resursa budućnosti, te složenih institucionalnih, pravnih i ekonomskih uslova, u kojima se nalazi sektor voda u najširem smislu. Zato održavanjem „Prvog BH Kongresa o vodama“, želimo da se vode u BiH prepoznaju kao mogući „motor“ razvoja, kako u energetici, poljoprivredi, industriji, turizmu, tako i u mnogim drugim djelatnostima.

Kongres ima međunarodni karakter. Kongres će na jednom mjestu okupiti stručnjake, konsultante i istraživače, predstavnike javnog sektora i vlasti, te nevladinih organizacija iz Bosne i Hercegovine, susjednih država i EU, s ciljem analize dosadašnjih rezultata i budućih izazova u optimiziranju upravljanja vodnim resursima, posebno njihovom korištenju.

To je prilika za uspostavljanje snažnog i svestranog, interaktivnog foruma za podsticanje ulaska u novi razvojni ciklus, na bazi održivog korištenja voda u BiH.

Na Kongresu će se tretirati slijedeće tematske cjeline:

- Održivi razvoj i vode
- Vodna politika
- Strategije razvoja i planovi upravljanja vodama
- Saradnja sektora voda s drugim sektorima
- Finansiranje projekata u sektoru voda
- Kadrovi i obrazovanje u sektoru voda
- Aktuelne teme u sektoru voda

Uvjereni smo da će Vaše aktivno učešće na Kongresu pomoći iznalaženju puta za bržu realizaciju strateških razvojnih evropskih, regionalnih i lokalnih projekata u BiH. Za više informacija posjetite : <http://www.uki.ba/8-novosti/147-kongres-o-vodama> ili kontaktirajte : 033 27 63 60 ili uki@bih.net.ba ;



TURSKA INVESTICIJA U TUZLI OTVARA NOVA RADNA MJESTA

Turski proizvođač i distributer namještaja „Kelebek“ otvorio je proizvodni pogon u krugu nekadašnje „Poliuretanske hemije“ koja ima oko 4.000m² zatvorene površine. U jednom od tri objekta smješten je salon namještaja Kelebek, a u druga dva objekat će biti pokrenuta proizvodnja igračaka i tekstila.

Prema planu turskih investitora, u sva tri objekta, do kraja tekuće godine, planirano je da se zaposli ukupno 200 radnika, a do sredine 2017. godine, taj broj bi se trebao popeti na 300. Dugoročni plan je da u budućnosti, u cijelom kompleksu bude uposleno oko 400 radnika.

„Kelebek Mobilya“ jedan je od prvih proizvođača namještaja u Turskoj. Uspješno rade od 1935. godine, kada su proizvodili drvene dijelove za avionska krila. Vremenom su, kroz modernizaciju i prilagođavanje tržištu, postali jedan od najvećih europskih proizvođača namještaja i lider na turskom tržištu, a svoje proizvode danas izvoze u 15 zemalja. Od 2012. godine vlasnik „Kelebeka“ je Doğtaş, također poznati proizvođač namještaja koji već uspješno posluje u BiH.



TURSKI INVESTITOR OTVARA POGON ZA RAFINISANJE JESTIVOG ULJA

Proizvodnja u pogonu za rafinisanje jestivog ulja trebala bi početi sa radom u poslovnoj zoni u Vogošći, kod Sarajeva, za dva mjeseca.

Kompanija pod imenom Starfield&Oils d.o.o. već je registrirana u Bosni i Hercegovini, a uskoro će primiti 28 radnika koji će raditi u proizvodnji. Iza ovog projekta stoji uspješna turska kompanija Orkide, koja osim Turske (Izmira), svoje podružnice ima u Japanu i SAD-u. Vrijednost investicije je dva miliona eura.



MISIJA FIPA-E

Agencija za unapređenje stranih investicija Bosne i Hercegovine je agencija koju je osnovalo Vijeće ministara Bosne i Hercegovine, a čija je osnovna zadaća :

- Privlačenje i povećanje priliva stranih investicija u Bosnu i Hercegovinu i poticanje postojećih investitora u zemlji na dalja ulaganja i širenje poslovanja
- Poboljšanje saradnje između privatnog i javnog sektora, predlaganje mjera za unapređenje okruženja za investiranje, a s time i ekonomskog razvoja
- Predstavljanje Bosne i Hercegovine kao zemlje poželjne za strane investitore



USLUGE FIPA-E

Vijeće ministara Bosne i Hercegovine je zadužilo Agenciju za unapređenje stranih investicija da pruži podršku direktnim stranim investicijama i da olakša priliv stranih ulaganja u našoj zemlji. Agencija saraduje s institucijama vlasti i investitorima, te pomaže nadležnim vlastima da poboljšaju zakonski okvir za strana ulaganja. FIPA takođe pomaže investitorima da uspostave kontakte s javnim i privatnim sektorima BiH. Pokazatelji koji se odnose na priliv investicija, uspostava kontakata i studije privrednih sektora koje su izradili FIPA stručnjaci i nezavisni konsultanti, omogućavaju da investitori budu u potpunosti informirani o investicijskim mogućnostima koje Bosna i Hercegovina trenutno nudi. Osim toga, FIPA usko saraduje i sa ambasadama i diplomatskim predstavništvima Bosne i Hercegovine, koji takođe mogu pomoći investitorima da istraže mogućnosti ulaganja u našoj zemlji.

FIPA pruža informacije, analize i savjete potencijalnim investitorima o poslovnom i investicijskom okruženju, uključujući:

- zakonodavstvo koje se odnosi na direktna strana ulaganja
- podsticaje koji se odnose na ulaganja
- ekonomska i poslovna kretanja u zemlji

FIPA identifikira i predstavlja postojeće bh. mogućnosti za strana ulaganja :

- investicijske projekte u fazi razvoja ili projekte koji su već spremni za realizaciju
- preduzeća u procesu privatizacije
- domaće firme koje traže stranog poslovnog partnera

FIPA pruža pomoć potencijalnim investitorima i onima koji su već investirali u zemlji kroz :

- saradnju s javnim i privatnim sektorom
- saradnju s vladinim i nevladinim institucijama kako bi se olakšao privredni razvoj
- saradnju s lokalnim, regionalnim i međunarodnim organizacijama kako bi se poboljšalo okruženje za ulaganja



DA BISTE SAZNALI VIŠE O USLUGAMA FIPA-E,
KOJE SU BESPLATNE, KONTAKTIRAJTE NAS
DIREKTNO.

Grbavička 4
71000 Sarajevo
Tel: +387 22 278 080
Fax: + 387 33 278 081
e-mail : fipa@fipa.gov.ba
www.fipa.gov.ba

Ured FIPA-e Mostar
Kneza Višeslava, Office 54
88000 Mostar
Tel/Fax: +387 36 558 815
E-mail: mostar@fipa.gov.ba

Ured FIPA-e Banja Luka
Jovana Surutke 13/III
78000 Banja Luka
Tel/Fax: + 387 51 226 180
E-mail: banjaluka@fipa.gov.ba

A map of Europe with white outlines of countries on a blue background. The country of Bosnia and Herzegovina is highlighted with a yellow and blue flag featuring white stars.

INVEST IN BOSNIA AND HERZEGOVINA YOUR NEW OPPORTUNITY

WWW.FIPA.GOV.BA